

摘藻堂四庫全書薈要

子部

欽定四庫全書薈要

子部

御定廣羣芳譜卷一

詳校官主事<sub>臣</sub>陳本

欽定四庫全書薈要卷一萬五百六十四

子部

御定佩文齋廣羣芳譜卷一

天時譜

雜  
禮記  
春

禮記鄉飲酒義東方者春春之為言蠢也產萬物者  
聖也注蠢動生之貌也聖之為言生也疏東方產育萬  
物故為春為聖爾雅春為青陽注氣青而溫陽春  
為發生公羊傳春者何歲之始也注春者天地開闢

之端養生之首 管子東方曰歲星其時曰春其氣曰  
風風生木 梁元帝纂要春曰陽春青春芳春三春九  
春風曰陽風春風暄風柔風惠風景曰媚景時曰良時  
嘉時芳時辰曰良辰嘉辰芳辰節曰華節芳節嘉節良  
節韶節淑節草曰弱草芳草芳卉木曰華木華樹芳樹  
陽樹林曰茂林芳林

彙考原詩小雅春日遲遲卉木萋萋倉庚喈喈采芣祁  
祁 增詩正義周成王太平之時于春時親耕籍田以

勸農桑又祈求社稷使年豐 周禮天宮內宰上春詔  
王后帥六宮之人而生種稑之種而獻之于王注先種  
後熟曰種後種先熟曰稑 史記叔孫通傳孝惠帝曾  
春出遊離宮叔孫生曰古者有春嘗果方今櫻桃熟可  
獻願陛下出因取櫻桃獻宗廟上許之諸果獻由此興  
原前漢書文帝紀元年三月詔曰方春和時草木羣  
生之物皆有以自樂 增律歷志少陽者東方東動也  
陽氣動物于時為春春蠢也物蠢生迺動運 後漢書

明帝紀永平三年春詔曰夫春者歲之始也始得其正則三時有成有司其勉順時氣勸督農桑章帝紀元和二年詔曰方春生養萬物子甲宜助萌陽以育時物郎覬傳方春東作布德之元陽氣開發養導萬物

逸周書禹禁春三月山林不登斧以成草木之長管

子日至六十日而陽凍釋七十日而陰凍釋陰凍釋而菑稷故春事二十五日之內耳莊子春雨日時草木怒生鉏耨于是乎始修草木之到植者過半而不知其然

尸子春為忠也東方而春春動也是故鳥獸孕榮華  
生萬物遂忠之至也 呂氏春秋冬至後五旬七日莒

蒲生乃耕莒者百草之先生者也于是始耕 淮南子  
春風至則甘雨降生育萬物草木榮華莫見其為者而  
功既成矣 春秋繁露木者春生之性農之本也 原

劉向別錄鄒衍居燕燕有谷地美而春不生黍稷衍吹  
律暖氣乃至草木乃生至今名黍谷 增焦氏易林百  
草嘉卉萌芽將出昆蟲扶戶陽明所得 谷風布氣萬

物出生萌庶長養華葉茂盛 春秋元命苞春者神明

推移精華結紐注神明猶陰陽也相推使物精華結成

紐結要也 春秋文耀鉤春致其時華實乃榮 洛陽

伽藍記法雲寺北有臨淮王或宅或性愛山林又重賓

客至于春風扇揚花樹如錦晨食南館夜遊後園僚寮

成羣俊民滿席絲桐發響羽觴流行詩賦并陳清言乍

起莫不領其玄奧忘其褊恡焉是以入或室者謂登仙

也荊州秀才張裴裳常為五言有句云異林花共色別



樹鳥同聲或以蛟龍錦賜之 史畧北齊盧士深妻崔

氏有才學春日以桃花和雪與兒齷面云取紅花取白  
雪與兒洗面作光悅取白雪取紅花與兒洗面作妍華  
取雪白取花紅與兒洗面作華容 國史補曲江大會  
先牒教坊請奏上御紫雲樓垂簾觀焉時或擬作樂則  
為之移日故曹松詩云追遊若遇三清樂行從應妨一  
日春勅下後人置皮袋例以圖障酒器錢絹入其中逢  
花即飲故張籍詩云無人不借花園宿到處皆攜酒器

行 原曲江春宴錄長安貴家遊賞翦百花裝成獅子  
互相送遺獅子有小連環欲送以蜀錦流蘇牽之曰春  
光且莫去留與醉人看 虞松方春謂握月擔風且留  
後日吞花卧酒不可過時 玉麈集穆宗宮中花開以  
重頂帳蒙蔽置惜春御史號曰括春 開元天寶遺事  
學士許慎選放曠不拘小節多與親友結宴于花圃中  
未嘗具帷幄設坐具使童僕輩聚落花鋪于坐下曰吾  
自有花裯何消坐具 楊國忠子弟每春至之時求名

花異木植於檻中以板為底以木為輪使牽之自轉所  
至之處檻在目前而便即歡賞目之為移春檻 長安  
貴遊子弟每至春時遊宴供帳于園囿中隨行載以油  
幕或遇陰雨以幕覆之盡驩而歸 長安俠少每至春  
時結朋聯黨各乘矮馬飾以錦韉金絡並轡于花樹下  
往來使僕從執酒皿而隨之遇好園則駐馬而飲 長  
安士女春時鬪花戴插以奇花多者為勝皆用千金市  
名花植于庭苑中以備春時之鬪也 長安士女遊春

野步遇名花則設席藉草以紅裙遮相插挂以為宴幄  
寧王春時于後園中紉紅絲為繩密綴金鈴繫于花  
梢之上每有烏鵲翔集則令園吏掣鈴索以驚之蓋惜  
花之故也 增六一詩話梅聖俞嘗與范希文席上賦

河豚詩春洲生荻芽春岸飛楊花河豚當是時貴不數  
魚蝦河豚常出於春暮羣游水上食絮而肥南人多與  
荻芽為羹云最美 溫公詩話先朝春月多名兩府兩  
制三館於後苑賞花釣魚賦詩嘉祐末仁宗復修故事

羣臣和御製詩是日微陰寒韓魏公時為首相詩卒章  
云輕雲閣雨迎天仗寒色留春入壽杯二十年前曾侍  
宴台司今日喜重陪東坡集吳越王妃每歲春必歸  
臨安王遺書曰陌上花開可緩緩歸矣吳人用其語為  
歌歲時雜記一月二氣六候自小寒至穀雨四月八  
氣二十四候每候五日以一花之風信應之小寒一候  
梅花二候山茶三候水仙大寒一候瑞香二候蘭花三  
候山礬立春一候迎春二候櫻桃三候望春雨水一候

菜花二候杏花三候李花驚蟄一候桃花二候棠梨三  
候薔薇春分一候海棠二候梨花三候木蘭清明一候  
桐花二候麥花三候柳花穀雨一候牡丹二候酴醾三  
候棟花棟花竟則立夏 曲洧舊聞范蜀公居許作長  
嘯堂前有茶藤架春時宴客花落酒杯中飲以大白舉  
坐無遺謂之飛英會 東臯雜錄花信風梅花風最先  
棟花風最後凡廿四番以為寒絕後唐人詩云棟花開  
後風光好梅子黃時雨意濃徐師川詩云一百五日寒

食雨二十四番花信風又古詩云早禾秧雨初晴後苦  
棟花風吹日長 蓬窓續錄曲江宴唐進士會同年於  
此豪客園戶爭以名花布道上進士乘馬盛服鮮製推  
同年俊少者為探花使白居易詩春風得意馬蹏疾一  
日看徧長安花 道山清話哲宗御講筵手折一柳枝  
翫程頤為講官奏曰方春萬物發生之時不可非時毀  
折哲宗亟擲于地 漁隱叢話蔡繁卿守揚州春時作  
萬花會用花十餘萬枝 原遯齋閑覽河朔春時多大

風飛塵撼木數日一作二三日方止以訪左右對曰不  
得是風且無年名曰吹花擘柳風草木百穀皆藉之

增乾淳歲時記禁中賞花非一先期後苑及修內司分  
任排辦凡諸苑亭榭花木妝點一新錦簾綃幕飛梭繡  
毬以至茵褥設放器玩盆窠珍禽異物各務奇麗起自  
梅堂賞梅芳春堂賞杏花桃源觀桃粲錦堂金林檎照  
妝亭海棠蘭亭修禊至于鍾美堂大花為極盛堂前三  
面皆以花石為臺各植名品臺後分植玉蘭繡毬數百



株儼如鏤玉屏堂內左右各列三層雕花彩檻護以彩色牡丹畫衣間列碾玉水晶金壺及大食玻璃官窑等瓶各簪奇品如姚魏御衣黃照殿紅之類幾千朵至于梁棟窓戶間亦以湘筒貯花鱗次簇插何翅萬朵自中殿妃嬪以至內官賞賜有差下至伶官樂部應奉人等亦霑恩賜謂之隨花賞至暮春則稽古會瀛堂賞瓊花靜侶亭紫笑淨香亭采蘭挑筍則春事已在綠陰芳草間矣 蔣苑使有小圃不滿二畝而花木匝亭榭奇

巧春時悉以所有書畫玩器羅列滿前闌竿花藍之類  
悉皆縷絲金玉為之且立標竿射垛及鞦韆梭門鬪雞  
蹴踘諸戲事以娛遊客衣冠士女至者招邀杯酒往往  
禁煙乃已謂之放春 湖山勝槩豐樂樓舊為衆樂亭

又改聳翠樓政和中改今名淳祐間趙京尹重建宏麗  
為湖山冠又甃月池立秋千梭門植花木構數亭春時  
遊人繁盛 清閒供春時晨起點梅花湯課奚奴灑掃  
護階苔取薔薇露浣手薰玉蕤香讀古赤文綠字書昀

午採筍蕨供胡麻汲泉試新茗午後乘款段馬執翦水  
鞭攜斗酒雙柑往聽黃鸝日晡坐柳風前裂五色牋集  
錦囊佳句薄暮遶徑灌花 花史漢武帝嘗以吸花絲  
所織錦賜麗娟命作舞衣春暮宴于花下舞時故以袖  
拂落花滿身都著舞態愈媚謂之百花舞 宗測春遊  
山谷間見奇花異草則繫於帶上歸而圖其形狀名聚  
芳圖百花帶人多效之 武陵儒生苗彤事園池以接  
賓客有野春亭雜植山花五色錯列 平湖上有龍湫

山花爛熳不可枚舉近寺茅簷草舍皆繞植桃李春遊  
士女輻湊杯盤狼籍無不手撚花枝醉呼潦倒者 西  
湖志杭州壽安坊俗稱官巷宋時謂之花市亦曰花團  
蓋汴京壽安山下多花園春時賞宴爭華競侈錦簇繡  
園移都後以花市比之故稱壽安坊今兩岸多賣花之  
家亦其遺俗也

集藻賦

御製春雨賦  
神籥網緼化機和煦元氣上融醲膏下聚首五

行者曰水潤萬物者惟雨于時蒼祇蒞節青鳥司晨餘寒  
未斂禁火方新風輕颺以習習雲密布而鱗鱗垂九霄之  
嘉澍飛四野之甘津始觸石以吐液旋彌空而散澤初曳  
縷以吹絲繼緣雷而滴墀乍密還疎欲斷又續拂宇披檐  
挹川注谷既磅礴而淋漓亦瀰漫而滲漉曼綺埒之明璣  
流銅池之文穀木欣欣以向榮草萋萋而如沐若夫徂畛  
徂隰是萊是穠麥漸秀田禾始苗廣地道之發育資土  
脈之沃饒雖霑體而塗足韋渥葉而濡條况乃灌溉神州

濺汪赤縣無遠弗屆靡幽不徧灑郊牧而歡呼決寰瀛而  
舞忭慶玉燭之長調喜豐年之屢見夫惟天地之德廣大  
無私春生夏長雲行雨施寓栽培于無意普美利于不知  
植品物以咸若含細大而莫遺所以解澤徬徨湛恩深厚  
覆被民生惠鮮隴畝興有渰于三陽敷仙霖於千耦世並  
享夫豐亨俗咸登於仁壽洋洋乎造物之弘功予一人乎  
何有

增晉夏侯湛春可樂賦春可樂兮樂東作之良時嘉新

田之啓菜悅中疇之發苗桑冉冉以奮條麥遂遂以揚  
秀澤苗翳渚原卉耀阜春可樂兮樂崇陸之可娛登夷  
岡以迴眺超矯駕乎山隅綴雜花以為葢集繁蕤以飾  
裳散風衣之馥氣納戢懷之潛芳鶯交交以弄音翠翻  
翻以輕翔招君子以偕樂攜淑人以微行 周庾信春

賦宜春苑中春已歸披香殿裏作春衣新年鳥聲千種  
囀二月楊花滿路飛河陽一縣併是花金谷從來滿園  
樹一叢香草足礙人數尺游絲即橫路開上林而競入

擁河橋而爭度出麗華之金屋下飛燕之蘭宮釵朶多  
而訝重髻鬟高而畏風眉將柳而爭綠面共桃而競紅  
影來池裏花落衫中苔始綠而藏魚麥纔青而覆雉吹  
簫弄玉之臺鳴佩凌波之水移戚里而家富入新豐而  
酒美石榴聊泛蒲桃醅醅芙蓉玉盞蓮子金杯新芽竹  
筍細核楊梅綠珠捧琴至文君送酒來玉管初調鳴絃  
暫撫陽春綠水之曲對鳳迴鸞之舞更炙笙簧還移箏  
柱月入歌扇花承節鼓協律都尉射雉中郎停車小苑



連騎長楊金鞍始被拓弓新張拂塵看馬埒分朋入射  
堂馬是天池之龍種帶乃荆山之玉梁艷錦安天鹿新  
綾織鳳皇三日曲水向河津日晚河邊多解神樹下流  
杯客沙頭度水人鏤薄窄衫袖穿珠帖領巾百丈山頭  
日欲斜三晡未醉莫還家池中水影懸勝鏡屋裏衣香  
不如花

文賦散句增晉傳玄陽春賦乾坤絪縕冲氣穆清幽蟄  
蠢動萬物樂生依依楊柳翩翩浮萍桃之夭夭灼灼其

榮繁華曄而耀野煒芬葩而揚英 湛方生懷春賦麥

芄芄而含秀柔藹藹而敷榮華照灼以爛林葉婀娜以

媚莖 王廙春可樂賦春可樂兮樂孟月之初陽冰泮

渙以微流土冒櫛而解剛野暄卉以揮綠山蔥蒨以發

蒼 李顥四時賦平臯眇莽中林蔥青野馬飛澗晨虹

垂旌陽燕南徂陰鴈北征素華皓皓丹秀熒熒 謝萬

春遊賦青陽司候勾芒御辰陳條灌以摧枯初莖蔚其

曜新纂豐葉而為幄靡翠草而成茵 宋劉義恭感春

賦天暍暖而流寒日陰翳而淪精風淑穆而吹蘭雨濛濛而洗莖草承澤而擢秀花順氣而飛馨 梁元帝春

賦洛陽小苑之西長安大道之東苔染池而盡綠桃含山而併紅露霑枝而重葉網縈花而曳風 隋蕭慤春

賦落花無限數飛鳥排花度禁苑玉饒風吹花春滿路

唐王勃春思賦蜀川風候隔秦川今年節候異常年

霜前柳葉銜霜翠雪裏梅花犯雪妍霜前雪裏知春早看柳看梅覺春好思萬里之佳期憶三秦之遠道澹蕩

春色悠揚懷抱野何樹而無花水何隄而無草 原宋  
之問春宴帝曲莊序萬株果樹色雜雲霞千畝竹林氣  
含煙霧激樊川而縈碧瀨浸以成波望太乙而鄰少微  
森然逼座 鋪落花以為藉結垂楊而代幄霽景含日  
晚霞五彩而丹青韶光卷雲春臯一色而凝黛 李邕  
春賦楊迴曲沼李雜芳園條煙濃而曳地花錦縟而當  
軒 李白春夜宴桃李園序幽賞未已高談轉清開瓊  
筵以坐花飛羽觴而醉月 惜餘春賦平原萋兮綺色

愛芳草兮如翦惜餘春之將闌每為恨而不淺

五言古詩

御製春旭日含新淑春光覆滿屋東皇轉歲華融氣雜山谷  
增晉郭璞春青陽暢和氣谷風穆以溫英蔭暉林薈昆  
蟲咸啓門高臺臨迅流四座列王孫羽蓋停雲陰翠鬱  
映玉樽 齊謝朓新渚宛洛佳遨遊春色滿皇州結軫  
青郊路迴瞰蒼江流日華川上動風光草際浮桃李成  
蹊徑桑榆蔭道周東都已倣載言歸望綠疇 梁簡文

帝春日年還樂應滿春歸思復生桃含可憐紫柳發斷

腸青落花隨燕入遊絲帶蝶驚邯鄲歌管地見許欲留

情 晚日後堂幔陰通碧砌日影度城隅岸柳垂長葉

窓挑落細跗花留蛺蝶粉竹翳蜻蜓珠賞心無與共染

翰獨踟躕 元帝春日新鶯隱葉嚙新燕向窓飛柳絮

時依酒梅花乍入衣玉珂逐風度金鞍映日暉無令春

色晚獨望行人歸 望春葉濃知柳密花盡覺梅疎蘭

生未可握蒲小不堪書 江淹當春四韻雷萌山中草

雲煦江上花流煙漾璇景輕風泛凌霞我有幽蘭念銜  
意矚望斜友人殊未還獨慰檐前華 虞義春郊光風

轉蕙晦香霧鬱蘭津暄遲蝶弄蘊景麗鳥和春樵歌喧  
隴暮漁柁亂江晨山中芳杜若依依獨思人 王筠春  
遊叢蘭已飛蝶楊柳未藏鴉物色相煎蕩微步出東家  
既同翡翠翼復如桃李花欲以千金笑迴君流水車

鮑泉春日新燕始新歸新蝶復新飛新花滿新樹新月  
麗新暉新光新氣早新望新盈抱新水新綠浮新禽新

聽好新景自新還新葉復新攀新枝雖可結新愁詎解  
顏 蕭瑱春日貽劉孝綽澗水初流碧山櫻早發紅新  
禽爭弄響落蕊亂從風拂檐多軟幹映戶悉花叢誰云  
相去遠垂柳對高桐 聞人倩春日高臺動春色清池  
映日華綠葵向光轉翠柳逐風斜林有鳴心鳥園多奪  
目花相與咸知節嘆子獨離家 陳徐陵春日岸煙起  
暮色岸水帶斜暉徑狹橫枝度簾搖驚燕飛落花承步  
履流澗寫行衣何殊九枝葢薄暮洞庭歸 周庾信詠



春逍遙遊桂苑寂絕想桃源狹石分花徑長橋映水門  
管聲驚百鳥人衣香一園定知歡未足橫琴坐樹根

楊師道春朝閒步休沐乘閒豫清晨步百林池塘藉芳  
草蘭芷襲幽衿霧中分曉日花裏弄春禽野徑香恆滿  
山堦筍屢侵何須命輕葢桃李自成陰 原唐李白春  
思燕草如碧絲秦桑低綠枝當君懷歸日是妾斷腸時  
春風不相識何事入羅幃 增張子容春江花月夜林  
花發岸口氣色動江新此夜江中月流光花上春分明

石潭裏宜照浣紗人 王維贈裴十迪風景日夕佳與

君賦新詩澹然望遠空如意方支頤春風動百草蘭蕙

生我籬暖暖日暖閨田家來致詞欣欣春還臯淡淡水

生陂桃李雖未開萸萸滿芳枝請君理還策敢告將農

時 韓愈感春偶坐藤樹下暮春下旬間藤陰已可庇

落蕊還漫漫疊疊新葉大瓏瓏晚花乾青天高寥寥兩

蝶飛翻翻時節適當爾懷悲自無端 孟郊長安早春

旭日朱樓光東風不驚塵公子醉未起美人爭探春探

春不為桑探春不為麥日日出西園祇望花柳色乃知

田家春不入五侯宅 獨孤及山中春思  
懶祭川水大

人家春日長獨謠晝不暮搔首慚年芳靡草知節換含

葩向新陽不嫌三徑深為我生池塘亭午井竈閒雀聲

響空倉花落沒屐齒風動羣木香歸路雲水外天涯杳

茫茫獨卷萬里心深入山鳥行芳景物相迫春愁未遽

忘 權德輿春日戲題江春好游衍處處芳菲積綵舫

入花津香車依柳陌綠楊煙裊裊紅蕊鶯寂寂如何愁

思人獨與風光隔 宋曾鞏和張友直城東春日東流  
抱孤城雨洗見春色風吹百草根道路千里碧莫盡溪  
漫漫波瀾散無跡遙林缺見山冉冉蒼靄積沙禽有行  
蹤文字不可識青松對桃李桃李紅李花白紅白勢方競  
青青守巖側君意無不諧研談欲俱得賦詩多所陳炳  
若觀龜拆城東不待到衆物已歷歷 朱子春日言懷  
春至草木變郊園猶掩扉茲晨與心會覽物徧芳菲桃  
萼破淺紅時禽悅朝暉泉谷暖方融原田水初肥東作

興庶毗歲功始在茲端居適自慰世事復有期終然心  
所向農畝還當歸 元吳師道德興開化道中春晨氣  
澄穆雜卉香滿路百舌鳴高林墟煙淡如霧農夫啓門  
出在野各有務行人獨何為憧憧自來去 兩崖蒼石  
間湍水激清瀉山桃爛紅芳光影連上下春風忽怒起  
意乃媚行者飛花撲人來攬之欲盈把 倪瓚春日雲  
林齋居池泉春漲深徑苔夕陰滿諷詠紫霞篇馳情華  
陽館晴嵐拂書幌飛花浮茗盃階下松粉黃窻間雲氣

暖石梁蘿薦垂翳翳行蹤斷非與世相違冥栖久忘返

七言古詩增陳賀循庭中有奇樹三春節物始芳菲遊

絲細草動春暉香風飄舞花間度好鳥和鳴枝上飛臨

池間竹偏增綠依堦映雪紛如玉溫室庭前竟不言鼓

吹樓中能作曲曾聞遠別舊難思攀折會取贈佳期長

條本自堪為帶密葉由來好作幃星稀漢轉月輪明徘

徊夜鵲屢相驚欲識幽人蘭杜徑山窓芳桂復叢生

唐文德后遊春曲上苑杏花朝日明蘭閨艷妾動春情

井上新花偷面色簷前嫩柳效身輕花中去來看蝶舞  
樹上長短聽流鶯林下何須遠借問出衆風流舊有名  
溫庭筠陽春曲雲母空窓曉烟薄香昏龍氣凝暉閣  
霏霏霧雨杏花天簾外春威著羅幕曲闌伏檻金麒麟  
沙苑芳郊連翠茵廐馬何能齧芳草路人不敢隨流塵  
惜春詞百舌問花花不語低回似恨橫塘雨蜂爭粉  
蕊蝶分香不似垂楊惜金縷願君留得長妖韶莫逐東  
風還蕩搖秦女含顰向煙月愁紅帶露空迢迢原宋

寇準江南春波渺渺柳依依孤村芳樹遠斜日杏花飛

江南春盡離腸斷蘋滿汀洲人未歸 增歐陽修春寒

東風吹雲海天黑饑龍凍雲雨不滴嗔雷隱隱愁煙白

宿露無光瑤草寂東皇染花滿春園天為花迷惜春色

呼雲鑠月恐紅蕩幾日春陰養花魄悠悠遠絮縈空擲

愁思織春挽不得高樓去天無幾尺遠岫參差亂屏碧

徐積江南春今年是處春風早江南地暖春逾好春

風次第入江山先入梅花既芳草芳草春深似有情真



共江山到洞庭落花流水武陵道湖中有山春更青斜  
陽西落一點明少年莫上岳陽城 陸游雨霽出遊十  
日苦雨一日晴拂拭拄杖西村行清溝泠泠流細水好  
風習習吹衣輕四鄰蛙聲已閣閣兩岸柳色爭青青辛  
夷先開半委地海棠獨立方傾城春工遇物初不擇亦  
秀燕麥開蕪菁薺花如雪又爛漫百草紅紫那知名小  
魚誰取置道側細柳穿頰危將烹欣然買放寄吾意草  
萊無地蘇疲氓 元周權春日即事吳蠶欲老疇未秧

拍隄野水迴橫塘淡煙疎樹綠陰薄落花飛絮白日長  
寒食油乾過冷節匆匆芳事歸鶖鴂枕書睡足午窓明  
雪乳浮浮翻兔褐

五言律詩

製春日郊行春殿晴雲曉鑾輿出禁闌桃花臨紫陌柳色  
啓青暉細雨清塵界和風散德威馬嘶馳道遠滿地盡芳  
菲玉泉春曉郊野初晴後芳春曙色旋孤巒堆畫障細  
穴吐新泉浪靜鮮鱗躍風恬紫葍妍怡情看萬象浩浩思

無邊春日觀花枝上流鶯蚤千紅萬紫香氣融催景麗  
風過遞年芳穠李花猶淺垂楊葉未長澗中春溜發疑是  
奏笙簧

增唐宋之問春日芙蓉園侍宴芙蓉秦地沼廬橘漢家  
園谷轉斜盤徑川迴曲抱源風來花自舞春入鳥能言  
侍宴瑤池夕歸途騎吹繁年光竹裏徧春色杏間遙  
煙氣籠青閣流文蕩畫橋飛花隨蝶舞艷曲伴鶯嬌今  
日陪歡豫還疑陟紫霄原杜甫春夜喜雨好雨知時

節當春乃發生隨風潛入夜潤物細無聲野徑雲俱黑  
江船火獨明曉看紅濕處花重錦官城 增秦系春日

閒居一似桃源隱將今過客迷礙冠門柳長驚夢院鶯  
啼澆藥泉流細圍碁日影低舉家無外事共愛草萋萋

王建長安春遊騎馬傍閑坊新衣著雨香桃花紅粉  
醉柳絮白雲狂不覺愁春去何曾得日長牡丹相次發  
城裏又須忙 韋述春日山莊初歲開韶月田家喜載  
陽晚晴搖水態遲景蕩春光浦淨漁舟遠花飛樵路香

自然成野趣都使俗情忘  
元稹遣春失却游花伴因  
風浪引將柳堤遙認馬梅徑誤尋香晚景行看謝春心

漸欲狂園林都不到何處枉風光  
于良史春山月夜

春山多勝事賞翫夜忘歸掬水月在手弄花香滿衣興  
來無遠近欲去惜芳菲南望鳴鐘處樓臺深翠微  
李

商隱判春一桃復一李井上占年芳笑處如臨鏡窺時  
不隱牆敢言西子短誰覺宓妃長珠玉終相類同名作  
夜光  
春宵自遣地勝遺塵事身閑念歲華晚晴風過

竹深夜月當花石亂知泉咽苔荒任徑斜陶然恃琴酒  
忘却在山家 春遊橋峻斑駁疾川長白鳥高煙輕唯  
潤柳風濫欲吹桃徙倚三層閣摩挲七寶刀庾郎年最  
少青草妒春袍 李中喜春雨有寄青春終日雨公子  
莫思情任阻西園會且觀南畝耕最憐滋隴麥不恨濕  
林鶯父老應相賀豐年兆已成 僧貫休春興柳暖鶯  
多語花明草盡長風流在詩句牽率繞池塘叫切禽名  
字飛狂蝶姓莊時來真可惜自勉掇蘭芳 原僧皎然

春興片雨拂檐楹煩襟四座清  
霏微過麥隴蕭散傍莎城  
靜愛和花落幽聞入竹聲  
朝觀趣無限高詠寄閒情  
增宋梅堯臣和元興遊春韻  
乘閒多野興信馬與君行  
碧樹斜通市清流曲抱城  
山花高下色春鳥短長聲  
日暮吾廬近還歌空復情  
春陰濃淡雲無定淒微氣

宇寒鳩鳴桑葉吐村暗杏花殘  
客子行裘薄春塘野水寬  
輕雷欣已發謬作採茶官  
李彌遜春日雜韻幽棲足  
春事晴日苦相催屐齒穿  
沙穩筇屨礙竹回光風初

轉蕙殘雪欲欺梅自是經過少柴門日日開 真山民  
春遊春光潑眼明占勝得新亭棠醉風扶起柳眠鶯喚  
醒非無杯泛綠安得髣髴皆青且事日為樂歌聲莫暫停  
元陳樵春日細雨花陰香輕煙草色勻驚禽長避客  
嬌燕却依人絃管紅樓酒踟躕紫陌塵東風競遊賞因  
想上林春 葉顥春日曉洞雲歸濕青山草木新天桃  
含宿雨嫩柳裊輕塵蝶翅寒猶怯蜂衙晚漸陳香風簇  
羅綺已有躡青人



七言律詩

仰製景山春望雲霄千尺倚丹丘輦下山河一望收鳳翥中  
天連紫闕龍蟠北極壯皇州煙生沆瀣春初麗露濕芙蓉  
翠欲流却向閭闔看部屋崇高還厓廟堂憂後苑漫興  
佳氣青蔥繞苑牆紅泉紫岫勝雲莊雕欄細草經春滿綺  
閣繁花入午香雨露生成隨品類鳶魚飛躍自低昂閑亭  
久坐渾無事靜對琴書覺意長

增唐張謂春園家宴南園春色正相宜大婦同行少婦

隨竹裏登樓人不見花間覓路鳥先知櫻桃解結垂簷

子楊柳能低入戶枝山簡醉來歌一曲參差笑煞郢中

兒包何和程員外春日東郊即事郎官休浣憐遲日

野老歡娛為有年幾處折花驚蝶夢數家留葉待蠶眠

藤垂委地縈珠寶泉迸侵堦浸綠錢直到閉關朝謁去

鶯聲不散柳含煙李紳憶春日曲江宴後許至芙蓉

園春風上苑開桃李詔許看花入御園香徑草中迴玉

勒鳳凰池畔泛金樽綠絲垂柳遮風暗紅藥低叢拂砌

繁歸繞曲江春景晚未央  
明月鎖千門  
王建春日五

門西望百官朝  
下五門西塵起春風過玉堤  
黃帕蓋鞍呈過馬紅羅纏頸鬪  
回雞館松枝重牆頭出御柳條長  
水面齊唯有教坊南草色古苔陰  
地冷萋萋  
楊巨源

長安春遊鳳城春報曲江頭  
上客年年是勝遊  
日暖雲山當廣陌  
天清絲管在高樓  
龍蔥樹色分仙閣  
縹緲花香泛御溝  
桂壁朱門新邸第  
漢家恩澤問鄼侯  
白居易

易錢塘湖春行  
孤山寺北賈亭西  
水面初平雲脚低  
幾

處早鶯爭暖樹誰家新燕啄春泥亂花漸欲迷人眼淺  
草纔能沒馬蹏最愛湖東行不足綠楊陰裏白沙堤

杭州春望望海樓明照曙霞護江堤白蹋晴沙潮聲夜  
入伍員廟柳色春藏蘇小家紅袖織綾誇柿蒂青旗沽  
酒趁梨花誰開湖寺西南路草綠裙腰一道斜 認春  
認得春風先到處西園南面水東頭柳初變後條猶重  
花未開前枝已稠暗助醉顏尋綠酒潛添睡興著紅樓  
知君未別陽春數直待春深好擬遊 溫庭筠春日野

行日西塘水金堤斜碧草芊芊暗吐芽野岸明媚山芍  
藥水田叫噪官蝦蟆鏡中有浪動菱蔓陌上無風飄柳  
花何事輕撓向溪客綠萍方好不還家方干春日年

去年來似有期日高添睡是春時雖將細雨催蘆筍却  
用東風染柳絲重霧已應吞海色輕霜何事挫花枝此  
時野客因花醉醉卧花間應不知宋陳襄春日賞林  
亭把酒春亭覽衆芳水精簾箔逗山光孤松冷落千年  
換野槿紛華一日香綠圃煙深迷蛺蝶曲池波暖睡鴛

鴛文園莫惜鷦裘費買取宜城作醉鄉 王廷珪春日

山行緩鞚青絲馬不嘶春山草長靜山扉  
迳林新筍斑斑出隔水幽禽欵欵飛  
雨過泉聲鳴嶺背日長花氣撲人衣  
雲藏遠岫茶煙起知有僧居在翠微  
陸游春日小園市塵不到放翁家  
繞麥穿桑野徑斜夜雨長深三尺水  
曉寒留得一分花悶從鄰舍分春瓮  
閒就僧窓試露芽自此年光應更好  
日驅秧馬聽縑車 雨霽春色粲然喜  
而有賦應接年光日漸慵猶能一飲  
百花空半

霑蝶粉簾櫳雨遠送鶯聲巷陌風千縷麴塵楊柳綠萬  
枝猩血海棠紅從來造物陶甄手却在閨人詩句中

朱子和秀野韻江皋晴日麗芳華翠竹疎疎映白沙路  
轉忽逢沽酒客眼明惟見滿園花望中景助詩人趣物  
外春歸釋子家向晚却尋芳草徑夕陽流水遶村斜

戴昺春事春事關心常起蚤愛看景物試凭欄戲魚池  
面微添綠嘯鳥枝頭尚帶寒新棘重樊新插柳醵泉頻  
灌自栽蘭年年賸有園林興每恨廬邊地不寬方岳

春日雜興高下雲藏野老家縱橫水漱竹籬斜勒將春  
去許多雨流出山來都是花白首風煙三徑草清時鼓  
吹一池蛙身閒不耐閒雙手洗甌炊香夜作茶 南岡  
北嶺對窓扉看盡朝嵐與夕霏社後未曾聞燕語雨中  
誰不惜花飛山醅約莫幾時熟沙筍輪囷一尺圍莫怨  
風光損桃李荼蘼芍藥又芳菲 高翥春日湖上清波  
門外放船時盡日輕寒戀客衣花下笑聲人共語柳邊  
檣影燕初飛曉風不定棠梨瘦夜雨相連薺麥肥最憶



故山春正好夜來先遣夢魂歸 真山民春曉雨破曉

檐花未放乾披衣和夢倚闌干釀成苔暈地猶濕老盡  
鶯聲風正寒無客醉敲金轡響有人睡怯翠衾單牡丹  
一夜成消瘦下却珠簾不忍看 元宋无春日野步翳

日榿陰翠幄遮葑園高下奕枰斜陂塘幾曲深淺水桃  
李一溪紅白花賴尾自跳魚放子綠頭相並鴨眠沙春  
郊景物堪圖寫輸與煙樵雨牧家 原明陸樹聲一番  
風雨釀重陰雲樹蒼茫自遠林徑滿煙蘿園作障石分

泉路細鳴琴青門插柳關幽思紫陌行春滯賞心最是  
桃花爭欲放不禁庭院曉寒侵 曹太章東風綠草到  
平臺小檻晴臨曲磴隈月影上洲楊柳亂霧香沾酒杏  
花開佳人步郭逢君飲卧病憐春強自來尋勝正當花  
度日蕊宮鶯蝶一齊回 于若瀛不問深紅與淺紅名  
園次第暗芳叢乍隨絮逐仍依草忽向西飛又轉東嫩  
碧朝添眉自恨流黃夜罷錦成空年年一度開還落始  
信隋家翦未工

五言排律增唐王叡春草碧色習習東風扇萋萋草色

新淺深千里碧高下一時春嫩葉舒煙際微香動水濱  
金塘明夕照輦路惹芳塵造化功何廣陽和力自均今  
當發生日瀝懇祝良辰 張嗣初賦得春色滿皇州何

處年華好皇州淑氣勻朝陽潛應律草木暗迎春柳變  
金隄畔蘭抽曲水濱輕黃垂輦道微綠映天津麗景浮  
丹闕晴光擁紫宸不知幽遠地今日幾枝新 李商隱  
永樂縣所居一草一木無非自栽今春悉已芳茂因書

即事一章手種悲陳事心期翫物華柳飛彭澤雪桃散

武陵霞枳嫩栖鸞葉桐香待鳳花綬藤縈弱蔓袍草展

新芽學植功雖倍成蹊跡尚賒芳年誰共翫終老邵平

瓜李郢春日題山家偶與樵人熟春殘日日來依崗

尋紫葢挽樹得青梅燕靜銜泥起蜂喧抱蕊回嫩茶重

攪綠新酒畧吹醅漠漠蠶生紙涓涓水弄苔丁香正堪

結留步小庭隈鄭谷木向榮園林青氣動衆木散寒

聲敗葉牆陰在滋條雪後榮欣欣春令早謁謁日華輕

庾嶺梅先覺隋堤柳暗驚山川應物候臯壤起農情祇  
待開花日連栖出谷鶯

五言絕句

製春夜玉鑪煙靄盡夜靜百花香曙氣浮丹陛春光拂象

牀

增唐張九齡荅靳博士上苑春先入中園花盡開唯餘  
幽徑草尚待日光催 張起春情畫閣餘寒在新年舊  
燕歸梅花猶帶雪未得試春衣 張仲素春遊曲萬樹

江邊杏新開一夜風滿園深淺色照在綠波中 煙柳

飛輕絮風榆落小錢濛濛百花裏羅綺競秋千 孟郊

春後雨昨夜一霎雨天意蘇羣物何物最先知虛庭草

爭出 王建春意雖是杏園主一株臨古岐從傷春意

早乞取舊開枝 權德輿春日戲題隨風柳絮輕映日

杏花明無奈花深處流鶯三數聲 許渾長安早春雲

月有歸處故山清洛南秦城一花落春夢滿江潭 宋

陸游春雨湖上新春柳搖搖欲喚人多情今夜雨先洗

馬蹏塵 楊萬里春日日落碧簷外人行紅雨中幽人  
詩酒裏又是一春風

七言絕句

御製春日佳氣山川決地行物隨節候變初晴雪消樹底花  
爭發冰泮池頭草欲生 春晴舟中作野水漫漫野岸長  
幾行嫩柳帶斜陽不知春色來多少但覺飛花處處香

增唐岑參山房春事風恬日暖蕩春光戲蝶遊蜂亂入  
房數枝門柳低衣桁一片山花落筆牀 王維遊春詞

經過柳陌與桃溪尋逐春光著處迷  
鳥度時時衝絮起  
花繁滾滾壓枝低  
帝應物春思  
野花如雪繞江城坐  
見年芳憶帝京  
閭闔曉開凝碧樹  
曾陪鷓鴣聽流鶯

錢起春郊水透冰渠漸有聲  
氣融煙霧晚來明  
東風好作陽和使  
逢草逢花報發生  
盧綸曲江春望  
菖蒲翻葉柳交枝  
暗上蓮舟鳥不知  
更到無花最深處  
玉樓金殿影參差  
翫春因寄馮衛二補闕  
戲呈李益掖垣春色  
自天來  
紅藥當階次第開  
萱草叢叢爾何物  
等閒穿



破綠莓苔 韓愈曲江春遊寄白二十二舍人漠漠輕

陰晚自開青天白日映樓臺曲江水滿花千樹有底忙

時不肯來 白居易晚春晝靜簾疎燕語頻雙雙鬬雀

動堦塵柴扉日暮隨風掩落盡閑花不見人 元稹與

吳侍郎春遊蒼龍闕下陪驄馬紫閣峯頭見白雲滿眼

流光隨日度今朝花落更紛紛 李賀南園花枝草蔓

眼中開小白長紅越女腮可憐日暮嬌香落嫁與春風

不用媒 李約江南春池塘春暖水紋開堤柳垂絲間

野梅江上年年芳意早蓬瀛春色逐潮來 羅鄴春日

題城南韋曲 韋曲城南錦繡堆千金不惜買花栽誰知  
豪貴多羈束落盡春紅不見來 韋莊春陌滿街芳草

卓香車仙子門前白日斜腸斷東風各回首一枝春雪

凍梅花 王周問春遊絲垂幄雨依依枝上紅香片片

飛把酒問春因底意為誰來後為誰歸 春荅花枝千

萬趁春開三月闌珊即自回剎向東園種桃李明年依

舊為君來 劉兼春遊柳成金穗草如茵載酒尋花共

賞春先入醉鄉君莫問十年風景在三秦 宋寇準春

晝偶書白晝偶成芳草夢起來幽興有新詩風簾不動

黃鸝語坐見庭花日影移 趙抃賞春亭滂葩浩艷滿

亭隈當席芳樽醉看來始信君恩不私物亂山窮處亦

花開 歐陽修豐樂亭遊春綠樹交加山鳥嘯晴嵐蕩

漾落花飛鳥歌花落太守醉明日酒醒春已歸 春雲

澹澹日輝輝草惹行襟絮拂衣行到亭西逢太守籃輿

酩酊插花歸 紅樹青山日欲斜長郊草色綠無涯遊

人不管春將老來往亭前蹋落花 王珪宮詞麗日祥

煙鎖禁林櫻桃初熟杏成陰年年翠輦來遊幸花落春

宮一寸深 王安石春風春風過柳綠如縑晴日蒸紅

出小桃池暖水香魚沒處一環清浪湧亭臯秦觀春

日黃金穀穀滿垂楊尚有春寒到畫堂酒力漸消歌扇

怯入簾飛雪帶梅香 崔鶉春日村居春草門前已沒

靴更無人過野人家離離細竹時聞雨淡淡疎簾不隔

花 王鎡段橋春望拾翠車間輦路塵山南山北杜鵑

春誰家庭院東風裏吹出桃花不見人  
金元好問梁

園春暖入金溝細浪添津橋楊柳綠纖纖賣花聲動天

街遠幾處春風揭繡簾  
元薩 拉春日偶成蹋馬歸

來過早春空階已見草如茵  
風吹綠青溪柳馬上輕

寒不著人  
馬臻春日閒居茶香庭院一枰棋柳景侵

堦日自移因見刺桐花滿樹等閒憶煞故園時  
西湖

春日要囑園丁取折枝紅桃白李紫薔薇石函橋畔人

煙晚挑得春光一擔歸  
春日幽居淺淺春風尚帶寒

日斜香篆半燒殘杏花一樹開如錦怕觸啼鶯不倚闌  
釋石屋山居吟滿山筍蕨滿園茶一樹紅花間白花  
大抵四時春最好就中尤好是山家

詩散句增晉陶潛歡言酌春酒摘我園中蔬 齊謝朓  
喧鳥覆春洲雜英滿芳甸 梁沈約春風搖雜樹歲蕤  
綠且丹 蕭子範春情寄柳色鳥語出梅中 陳張正

見春光落雲葉花影發晴枝 唐王勃草綠紫春帶榆  
青綴古錢 芳樹搖春晚晴雲入座飛 岑參竹深喧

暮鳥花缺露春山

鶯聲隨坐嘯柳色喚行春  
原杜

甫漢節梅花外春城海水邊

夜雨翦春韭新炊間黃

梁野館濃花發春帆細雨來

一徑野花落孤村春

水生雲溪花淡淡春郭水泠泠

增錢起蘭蕙暖初

吐春鳩鳴欲巢

嚴維柳塘春水漫花塢夕陽遲

李

嘉祐野渡花爭發春塘水亂流

儲嗣宗鶴語松上月

花明雪裏春

劉禹錫花含欲語意草有鬬生心

柳

宗元平野草綠晚鶯嘯遠林

白居易紅簇交枝杏

春含卷葉荷 春樹花珠顆 春塘水麴塵 崔塗忽覺

草木變始知天地春 曹松御柳舞著水 野鶯啼破春

宋余靖松溪千蓋雨 茶圃一旗春 司馬光草遶春

街碧花繁夕市紅 毛滂春渚連天濶 春風夾岸香

王安石冉冉春行暮 菲菲物競華 蘇軾行看花柳動

共享無邊春 晁補之春風入木心 皮肌發紅綠 吳

中復花涵清露曉風卷綠波春 元馬祖常竹光浮晝

碧花蕊颺春紅 陳樵春風何處來 草木忽已榮 倪



瓚薜蕪細雨濕桃李春風寒  
馬臻淑氣浮芳鮮山澤

一時綠  
原馮琦梅圃懸春月松扉拂澗虹  
增唐王

維草色全經細雨濕花枝欲動春風寒  
李白長安白

日照春空綠楊結煙垂裊風  
杜甫落花遊絲白日靜

鳴鳩乳燕青春深  
李賀朱城報春更漏轉光風催蘭

吹小殿  
溫庭筠霏霏霧雨杏花天簾外春威著羅幕

曹松半夜笙歌教洗月平明桃李放燒春  
司空圖

孤嶼池痕春漲滿小欄花韻午晴初  
宋韓琦草濕漫

鋪留醉席榆寒難掃買春錢  
石延年鶯聲不逐春光

老花影長隨日脚流  
王安石濃綠萬枝紅一點動人

春色不須多  
蘇軾卧聞百舌呼春風起尋花柳村村

同  
陋巷關門負朝日小園除雪得春蔬  
浥浥爐香

初泛夜離離花影欲搖春  
陸游小桃婀娜并芳柔紅

蘭茁芽滿春洲  
小樓一夜聽春雨深巷明朝賣杏花

新陽蘇醒春前柳輕暖醫治雪後梅  
春深水暖多

魚婢雨足年豐少麥奴  
靜院春風傳浴鼓畫廊晚雨

濕茶煙 元耶律楚材花藏徑畔春泉碧雲散林梢晚

照明 郝經四圍紅錦春風軟滿地綠陰春晝長 許

衡萬樹春紅羅錦綺一灣晴碧捲玻璃 王惲花枝入

簾春夢香遊絲翻空晝長 許謙春風生草雉堞青

隨處軟茵供小坐 倪瓚柳絮如煙迷曉浦杏花飛雪

點春波 顧阿瑛桃花亭亭笑酣春溪邊浣花染溪水

馬臻蟄雷夜送催花雨香徑春迷鬪草人 唐上官

儀春堤芳草積 杜甫春風花草香 武元衡春風綻

百花 白居易春染柳梢黃 韋莊杏花春陌馬聲嬌

宋劉筠杏梁春晚燕占泥 宋祁風光駘蕩百花春

蘇軾滿地春風掃落花 陸游春晚江邊草過腰

春近野梅香初動 元虞集山雨欲來春樹暗 桃花

吹雨春牽纜 周權渚波春綠荻芽新 郭鈺野徑春

煙匝翠蘿 萬絲煙柳鎖春晴 葉顥隔溪春色兩三

花

詞增唐馮延巳三臺令春色春色依舊青山紫陌日斜

柳暗花蔦醉卧春風少年少年少行樂直須及早

王建三臺令蝴蝶蝴蝶飛上金枝玉葉君前對舞春風  
百葉桃花樹紅紅樹紅樹燕語鶯啼日暮 宋毛滂憶

秦娥夜夜夜了花朝也連忙指點銀瓶索酒嘗 明朝

花落知多少莫把殘紅掃愁人一片花飛減却春 洪

适生查子桃疎蝶惜春柳困鶯銜絮日影過簾旌多少

閒愁緒 紅綻武陵溪綠暗章臺路春色似行人無意

花間住 唐和凝春光好蘋葉軟杏花明畫船輕雙浴

鴛鴦出綠汀棹歌聲 春水春風無浪春天半雨半晴

紅粉相隨南浦晚幾含情 宋張槃浣溪沙習習輕風

破海棠鞦韆移影上迴廊晝長蝴蝶為誰忙 度柳早

鶯分暖綠過花小蝶帶春香滿庭芳草又斜陽 高觀

國菩薩蠻春風吹綠湖邊草春光依舊湖邊道玉勒錦障

泥少年遊冶時 煙明花似繡且醉旗亭酒斜日照花

西歸鴉花外嘯 程垓菩薩蠻畫橋泊泊春江綠行人

正在春江曲花潤接平川有人花底眠 東風原自好

只怕催花老安得萬垂楊繫教春日長 周密謁金門

芳事晚數點杏鈿香淺惻惻輕寒風翦翦錦屏春夢遠  
穉柳拖煙嬌軟花影暗藏深院初試輕衫并畫扇牡

丹紅未展 李之儀好事近春到雨初晴正在小樓時

節柳眼向人微笑傍闌干堪折 暮山濃淡瑣烟霏梅

杏半明滅玉笋莫辭沉醉判歸時斜月 唐歐陽炯清

平樂春來階砌春雨如絲細春徑滿飄紅杏蒂春燕舞

隨風勢 春幡細縷春繒春閨一點春燈自是春心撩

亂非關春夢無憑 宋王安國清平樂留春不住費盡

鶯兒語滿地殘紅宮錦污昨夜南園風雨 小憐初上

琵琶曉來思繞天涯不肯畫堂朱戶春風自在楊花

王安中清平樂花時微雨未減春分數占取簾疎花密

處把酒聽歌金縷 斜風輕度濃香閒情正與春長向

晚紅燈入坐嘗新青杏隨觴 盧祖皋西江月燕掠晴

絲裊裊魚吹水葉粼粼禁街微雨灑芳塵寒食清明相

近 謾著宮羅試暖閒呼社酒酬春晚風簾幕悄無人



二十四番花信 毛滂西江月煙雨半藏楊柳風花初

著桃花玉人細細酌流霞醉裏將春留下 柳外鴛鴦

作伴花邊蝴蝶為家醉翁醉也且由他月在柳橋花下

周密西江月波影暖浮玉甃柳陰深鎖金鋪湘桃花

褪燕調雛又是一番春暮 碧桂情深鳳怨雲屏夢淺

鶯呼繡窓人倦冷薰爐簾影搖搖亭午 吳潛南柯子

池水凝新碧欄花駐老紅有人獨倚橋東手把一枝楊

柳繫春風 鵲伴遊絲墮蜂黏落蕊空秋千庭院小簾

櫳多少閒情閒緒雨聲中  
楊无咎於中好墻頭艷杏

花初試繞珍叢細按紅蕊欲知占盡春明媚悄無意看

桃李持杯準擬花間醉一葉兩葉飛墮晚來旋旋深

無地更聽得東風起毛滂蹋莎行階影紅遲柳苞黃

偏纖雲弄日陰晴半重簾不捲篆香橫小花初破春叢

淺鳳繡猶重鴨爐長暖屏山翠入江南遠醉輕夢短

枕閒歌綠窓窈窕風光轉元何可視蝶戀花金井啼

鴉深院曉颺盡東風柳絮吹難了燕子多情相識早杏

梁依舊雙雙到 一縷沉煙簾幕悄滿眼飛花祇攪人  
懷抱十二玉樓春樹杪天涯不斷青青草 宋俞國寶  
風入松一春長費買花錢日日醉湖邊玉驄慣識西湖  
路驕嘶過沽酒樓前紅杏香中歌舞綠楊影裏秋千  
暖風十里麗人天花壓鬢雲偏畫船載得春歸去餘情  
付湖水湖煙明日重扶殘醉來尋陌上花鈿 柳永木  
蘭花慢坼桐花爛漫乍踈雨洗清明正艷杏燒林絳桃  
繡野芳景如屏傾城盡尋勝賞驟雕鞍紺轡出郊坰風

暖繁絃脆管萬家競奏新聲 盈盈鬪草蹋青人艷冶

逌逢迎向路旁往往遺簪墮珥珠翠縱橫歡情對佳麗

地任金壘罄竭玉山傾揀却明朝永日畫堂一枕春醒

黃機喜遷鶯平湖百畝種滿湖蓮葉繞堤楊柳冉冉

波光輝輝煙影空翠濕霑襟袖靜愜鄰雞啼午暖逼沙  
鷗眠晝西園路更紅塵不斷蝶酣蜂瘦 知否堪晝處

野薺蕪菁胷地鋪茵繡桃李陰邊桑麻叢裏斜矗酒帘

誇酒竹寺小依山趾茅店平窺津口春又晚正香風有

客倚闌搔首

別錄增汜勝之書栽樹正月為上時二月為中時三月  
為下時然棗雞口槐兔目桑蝦蟇眼榆負瘤散其餘雜  
木鼠耳室趺各其時凡種栽并插皆用此等形象本  
草凡採根物多以春月採者謂春初津潤始萌未衝枝  
葉勢力淳濃也春月移栽各樹宜上半月前則茂而  
結實移栽松柏槐柳桑柘橙橘各色樹皆可

御定佩文齋廣羣芳譜卷一

謹案卷一第三十四頁前三行薩都拉舊作薩都  
刺今改後倣此






謹案第二頁後六行七十日而陰凍釋刊本脫十  
字據管子增

第十二頁前一行柘弓新張刊本脫柘字據庚子  
山集增

第二十九頁後五行依崗尋紫葢刊本葢訛菊據  
全唐詩改

第三十八頁後五行高觀國菩薩蠻刊本脫國字  
今增





總校官庶吉士臣侍朝

校對官檢討臣王福清

謄錄監生臣楊師曾

欽定四庫全書薈要

子部

御定廣羣芳譜卷

二

詳校官主事

臣

陳木

欽定四庫全書舊要卷一萬五百六十五

子部

御定佩文齋廣羣芳譜卷二

天時譜

正月

立春雨水元日  
人日上元附見

增禮記月令孟春之月日在營室昏參中旦尾中註日

月會於娵訾而斗建寅之辰也 是月也天氣下降地  
氣上騰天地和同草木萌動王命布農事命田舍東郊  
皆脩封疆審端徑術善相丘陵阪險原隰土地所宜五

穀所殖以教道民必躬親之田事既飭先定準直農乃  
不惑 梁元帝纂要正月孟春亦曰孟陽孟陬上春初  
春開春發春獻春首春首歲初歲開歲發歲獻歲肇歲  
芳歲華歲 原花月令是月也迎春生櫻桃胎望春盈  
眸蘭蕙芳李能白杏花飾其屬 增瓶史月表正月花

盟主梅花寶珠茶花客卿山茶鐵幹海棠花使令瑞香  
報春木瓜 花歷正月瑞香烈徑草綠百花萌動

彙考增詩豳風三之日于耜疏三之日三陽之月夏之

正月也于耜往脩田器也

禮記月令是月也天子乃

以元日祈穀於上帝乃擇元辰天子親載耒耜措之于

參保介之御間帥三公九卿諸侯大夫躬耕帝籍天子

三推三公五推卿諸侯九推周禮天官上春詔王后

帥六宮之人而生種稑之種而獻之於王夏小正正

月柳稊註稊也者發芽也梅杏杔桃則華註杔桃山

桃也大戴禮孟春百草權輿國語太史順時覲土

農祥晨正土乃脈發註農祥天駟即房星也晨正中

謂正月初也 管子正月令農始作服於公田農耕及

雪釋耕始焉芸卒焉 原西京雜記戚夫人侍高帝常

以正月上辰出池邊盥濯食蓬餌以祓妖邪 酉陽雜

俎北朝婦人正月進箕帚長生花 夢溪筆談正月陽

氣始建兆乎萬物故曰登明 續明道雜志紹聖戊寅

歲余在黃州見上元沽酒人頭已簪麥穗土人言當年

不爾 賞心樂事正月玉照堂賞梅叢奎閣賞山茶湖

山尋梅攬月橋看新柳 歲華紀麗正月二十三日聖



壽寺前蠶市張公詠始即寺爲會使民鬻農器 立春

增禮記月令先立春三日太史謁之天子曰某日立春

盛德在木天子乃齋立春之日天子親帥三公九卿諸

侯大夫以迎春於東郊 後漢書禮儀志立春日夜漏

未盡五刻京師百官皆衣青衣郡國縣道官下至斗食

令史皆服青幘立春幡施土牛耕人於門外以示兆民

易通卦驗立春條風至冰解楊柳津 要覽列子御

風常以立春歸於八荒是風至則草木發生 玉泉記

立春日取弘農宜陽金門山竹爲管河內葭草爲灰以  
候陽氣 撫遺東晉李郢立春日命以蘆服芹芽爲菜  
盤相餽貺 四時寶鏡立春日春餅生菜號春盤 景  
龍文館記正月八日立春內出綵花賜近臣武平一應  
制云鸞輅青旂下帝臺東郊上苑望春來黃鶯未解林  
間轉紅藥先從殿裏開畫閣條風初變柳銀塘曲水半  
含苔欣逢睿藻光韶律更促霞觴畏景催是日中宗手  
勅批云平一年雖最少文甚警新悅紅藥之先開訝黃

鶯之未轉循還吟咀賞嘆兼懷今更賜花一枝以彰其

美所賜學士花竝令挿在頭上後所賜者平一左右交  
挿因舞蹈拜謝時崔日用乘酣飲欲奪平一所賜花上  
於簾下見之謂平一曰日用何爲奪卿花平一跪奏曰  
讀書萬卷從日用滿口虛張賜花一枝學平一終身不  
獲上及侍臣大笑因更賜酒一杯當時嘆美 齊人月  
令立春日食生菜取迎新之意 東京夢華錄立春日  
自郎官御史以上皆賜春幡勝人賀訖戴歸私第又士

大夫家翦綵爲春幡或綴於花枝之下或翦爲春蝶春  
錢春勝以爲戲東坡立春日亦簪幡勝過子由諸子姪  
笑指云伯伯老人亦簪花勝耶 原撫言安定郡王立  
春日作五辛盤 增修真秘言立春日清朝北望有紫  
綠白雲者爲三元君三素飛雲也蘓衛公作春帖子詞  
萬年枝上看春色三素雲中望玉晨 熙朝樂事立春  
舉酒縷切粉皮雜以七種生菜供奉筵間蓋古人辛盤  
之遺意焉 雨水增孝經緯立春後十五日斗指寅爲

雨水 七修類稿雨水正月中天一生水春始屬木然

生木者必水也 元日增舊唐書姚璹傳長壽二年元

日大雪上謂羣臣曰元日雪百穀豐此語有何故璹

曰汜勝之書雪是五穀之精 四民月令梅花酒元日

服之却老 風土記元日食五辛以煉形以助五臟

原裴玄新語正旦縣官殺羊懸其頭於門又磔雞以鬪

之俗說以厭厲氣玄以問河南伏君伏君曰是月土氣

上升草木萌動羊啮百草雞啄五穀故殺之以助生氣

荆楚歲時記正月一日進椒柏酒飲桃湯進屠蘇酒膠牙餠下五辛盤造桃版著戶謂之仙木按四民月令云過臘一日謂之小歲拜賀君親進椒酒椒是玉衡星精服之令人身輕耐老柏是仙藥成公子安椒花銘則曰肇惟歲首月正元日厥味惟珍蠲除百疾是知小歲則用之漢朝元正則行之桃者五行之精厭伏邪氣制百鬼也董勛云俗有歲首用椒酒椒花芬香故采花以貢樽風俗記正旦楚人上松柏頌周庾信有柏葉銘

清異錄咸通後士風尚於正旦未明佩紫赤囊中盛

人參木香如豆樣時時傾出嚼吞之至日出乃止號迎

年佩 石湖詩註成都元日滴酥爲花熬芋爲柳葉三

夕張燈如上元 熙朝樂事正月朔日簽柏枝於柿餅

以大橘承之謂之百事大吉 人日增景龍文館記景

龍四年七日宴大明殿賜王公以下綵縷人勝李嶠應

制詩桂吐半輪迎此夜莫開七葉應今朝蘓頌詩七葉

仙萸承月吐千林御柳拂煙開崔日用詩曲江苔色冰

前液上苑梅香雪裡飄 荆楚歲時記正月七日爲人  
日以七種菜爲羹翦綵爲人或鏤金箔爲人以貼屏風  
亦戴之頭鬢又造花勝以相遺登高賦詩 上元增明  
皇雜錄唐上元夜宮人以黃羅包柑遺近臣謂之傳柑  
宴 原影燈記洛陽人家造芋卽君食之宜男女 荆  
楚歲時記正月望日作豆糜以祀門戶先以柳枝插門  
隨枝所指以酒脯飲食及豆粥插箸而祭 聞見近錄  
紹聖二年上元幸集禧觀出宮花賜從駕臣僚各數十



枝時人榮之

集藻原梁昭明太子錦帶書垚斗周天送玄冥之故節  
東風拂地啓青陽之芳辰梅花舒兩歲之裝柏葉汎三  
光之酒 增宋張耒人日飲酒賦歲後七日其名曰人  
愛此嘉名飲酒歡欣豈竹木之始和生庶彙而施仁

明倪謙早春賦漏暖信於梅枝兮見天心之來復窺韶  
光於柳眼兮驗百卉之回綠 顧起元元夕賦霧淑風  
隄乍旖旎以醒柳霜墟氷嶠尚參差而落梅

五言古詩增梁沈約初春夾道覓陽春相將共攜手草  
色猶自腓林中都未有無事逐梅花空教信楊柳且復  
歸去來含情寄杯酒 周宗慄蚤春昨暝春風起今朝  
春風來鶯鳴一兩轉花樹數重開散粉成初蝶翦綵作  
新梅遊客三千里無暇上高臺 隋薛道衡人日入春  
纔七日離家已二年人歸落鴈後思發在花前 唐白  
居易立春後五日立春後五日春態紛婀娜白日斜漸  
長碧雲低欲墮殘冰折玉片新萼排紅顆遇物盡欣欣

愛春非獨我迎芳後園立就暖前簷坐還有惆悵心欲別紅爐火

七言古詩增唐李賀正月樂詞上樓迎春新春歸暗黃著柳宮漏遲薄薄淡靄弄野姿寒綠幽風生短絲錦牀曉卧玉肌冷露臉未開對朝暝官街柳帶不堪折早晚菖蒲勝綰結

五言律詩

御製元夜與諸王宴飲乾清宮今夕丹帷宴聯翩集懿親傳

柑宜令節行葦樂芳春香泛紅螺重光搖絳蠟新不須歌  
湛露明月足留人

增唐虞世南奉和獻歲讌宮臣履端初啓節長苑命高  
筵肆夏喧金奏重潤響朱絃春光催柳色日彩泛槐煙  
微臣同濫吹謬得仰鈞天 盧照鄰元日述懷筮仕無  
中扶歸耕有外臣人歌小歲酒花舞大唐春草色迷三  
徑風光動四鄰願得長如此年年物候新 高紹晦日  
宴高氏林亭嘯侶入山家臨春翫物華葛絲調綠水桂

醕酌丹霞岸柳開新葉庭梅落早花興洽林亭晚方還  
倒載車 嚴維晦日宴遊晦日湔裾俗春樓致酒時山

公還已醉謝客舊能詩溪柳熏晴淺巖花待閨遲爲邦  
久無事比屋自熙熙 白居易新居早春靜巷無來客  
深居不出門鋪沙葢苔面掃雪擁松根漸暖宜閒步初  
晴愛小園見花都未有唯覺樹枝繁 曹松立春春日

一杯酒便吟春日詩木梢寒未覺地脈暖先知鳥轉星  
沉後山分雪薄時寧無翦花手贈與最芳枝 宋呂夷

簡江南立春仄律何時應江春昨夜來細風先動柳殘  
雪不藏梅餘冷迷清管微和發凍醅閉門無客到樽俎  
爲誰開 宋伯仁歲旦居閒無賀客早起但如常桃版  
隨人換梅花隔歲香春風回笑語雲氣卜豐穰柏酒何  
勞勸心康壽自長 元趙孟頫早春谿上春無賴清晨  
坐水亭草芽隨意綠柳眼向人青初日收濃霧微波亂  
小星誰歌採蘋曲愁絕不堪聽

七言律詩增唐韋元旦奉和立春遊苑迎春應制灞浹

長安恒近日殷正臘月早迎新池魚戲葉仍含凍宮女  
裁花已作春向苑雲疑承翠幄入林風若起青蘋年年  
斗柄東無限願挹瓊觴壽北辰 馬懷素奉和立春遊

苑迎春應制元籥飛灰出洞房青郊迎氣肇初陽仙輿  
暫下宜春苑御醴行開薦壽觴映水輕苔猶隱綠緣隄  
弱柳未輸黃惟有裁花飾簪鬢恒隨聖藻狎年光 杜  
甫立春春日春盤細生菜忽憶兩京梅發時盤出高門  
行白玉菜傳纖手送青絲巫峽寒江那對眼杜陵遠客

不勝悲此身未知歸定處呼兒覓紙一題詩 戴叔倫

和汴州李相公勉人日喜春年來日日春光好今日春

光好更新獨獻菜羹憐應節遍傳金勝喜逢人烟添柳  
色看猶淺鳥踏梅花落已頻東閣此時聞一曲翻令和  
者不勝春 原韋莊立春青帝東來日馭遲暖煙輕逐

曉風吹罽袍公子樽前覺錦帳佳人夢裏知雪圃乍開  
紅菜甲綵幡新翦綠楊絲殷勤爲作宜春曲題向花牋  
貼繡楣 增宋韓琦至和乙未元日立春元日難逢是



立春普天誰不喜佳辰一年氣候均諸節萬卉芳菲實  
九旬柏葉始傾爲壽酒土牛隨示力耕人故陰盡草無  
餘臘端朔陽來慶共新 蘇軾正月二十日往岐亭郡

人潘古郭三人送予於女王城東禪莊院十日春寒不  
出門不知江柳已搖村稍聞泱泱流水谷盡放青青沒  
燒痕數畝荒園留我住半瓶濁酒待君溫去年今日關  
山路細雨梅花正斷魂 范成大立春日郊行竹擁溪  
橋麥蓋坡土牛行處亦笙歌麴塵欲暗垂垂柳醅面初

明淺淺波日滿縣前春市合潮平浦口暮帆多春來不  
飲兼無句奈此金旛綠勝何 陸游立春前一日作開  
年化日已舒長漸見風和鳥變吭冒土萱芽穿嫩綠拂  
橋柳色弄輕黃重溫壽酒屠蕪醺探借春盤餅餌香不  
入城門今幾歲遙知車馬正匆忙 立春日日出風和  
宿醉醒山家樂事滿餘齡年豐臘雪經三白地暖春郊  
已遍青菜細簇花宜薄餅酒香浮螳瀉長瓶湖村好景  
吟難盡乞與侯家作畫屏 朱淑真立春停杯不飲待

春來和氣先春動六街生菜乍挑宜捲餅羅幡旋翦稱  
聯釵休論殘臘千重恨管入新年百事諧從此對花并  
對景盡拘風月入詩懷 元程鉅夫和王寅夫郎中元  
日立春馬蹄塵裏度芳辰帶得陽和到七閩山翠倚天  
迎好客風光滿地屬吟身高情古柳仍青眼時態夭桃  
自絳脣從此不憂江海遠春官袖有十分春 楊維禎  
嬉春體今朝立春好天氣况是太平朝野時走向南鄰  
覓酒伴還從西墅買花枝陶令久辭彭澤縣山公祇愛

習家池宜春帖子題贈爾日日春遊日日宜 西子湖  
頭春色濃望湖樓下水連空柳條千樹僧眼碧桃花一  
株人面紅天氣渾如曲江節野人正是杜陵翁得錢沽  
酒勿復較如此好懷誰與同

五言排律增唐冷朝陽立春玉律傳佳節青陽應北辰  
土牛呈歲稔綵燕表年春臘盡星迴次寒餘月建寅風  
光行處好雲物望中新流水初銷凍潛魚欲振鱗梅花  
將柳色偏思越鄉人 明吳兆元旦書事閩中風景麗

元旦百花開有岸皆紫草無波不染苔樹光搖粉堞雲  
彩照金壘濃黛新年點春衣隔歲裁夜爐藏宿火曉燭  
翦殘灰袖裏分餘蕙釵邊眉落梅松枝當戶插淑氣拂  
窓來正好隨懽笑那知客思催

五言絕句

御製春盤小摘園中露新香糝作羹歲和欣有兆甘菜已春  
生

增唐杜甫瀼西果園正月喧鶯未茲辰放鷁初雪籬梅

可折風樹柳微舒 李中早春一種和風至千花未散

妍草心竝柳眼長是被恩先 儲嗣宗早春野樹花初

發空山獨見時踟躕歷陽道鄉思滿南枝 宋朱子立

春前一日雪花寒送臘梅萼暖生春歲晚江村路雲迷

景更新

七言絕句增唐元稹第三歲日詠春風憑楊員外寄長

安柳三日春風已有情拂人頭面稍憐輕殷勤爲報長

安柳莫惜枝條動軟聲 楊巨源城東早春詩家清景

在新春綠柳纔黃半未勻若待上林花似錦出門俱是  
看花人 韓滉晦日呈諸判官晦日新晴春自嬌萬家

攀折渡長橋年年老向江城守不覺東風換柳條 來  
鵬早春新歷才將半紙開小庭猶聚爆竿灰偏憎楊柳  
難鈴轄又惹東風意緒來 宋黃庶探春雪裏猶能醉

落梅好營杯具待春來東風便試新刀尺萬葉千花一  
手栽 方岳立春綵燕雙簪翡翠翹巧裁銀勝試春韶  
東風已到闌干北看見嬌黃上柳條 真山民早春小

桃枝上認年華隨分紅開一兩花將謂春風只城市也  
吹春色到山家 元劉詵元日曉街泥淺馬蹄過元日

雖陰地已和處處桃花如二月東風應比去年多 劉

因探春道邊殘雪護頽牆牆外柔絲露淺黃春色雖微  
已堪惜輕寒休近柳梢傍 趙雍早春高捲珠簾日漸

長梅花庭院雪飄香閒倚闌干看新柳不知誰爲染穠

黃 明李東陽正月十八日甘棠院上元纔過又尋春

紅白山花粲粲新似喜使君初病起隔欄相向笑迎人



原陳繼儒早春春風無力柳條斜新草微分一抹沙欲  
向主人借鋤插掃開殘雪種梅花

詩散句原唐杜甫元日到人日未有不陰時冰雪鶯難  
至春寒花較遲 增唐張謂北斗回新歲東園值早春

竹風能醒酒花月解留人 趙璜正月今朝半陽臺信

未迴水芹寒不食山杏雨應開 宋之問節晦冥金落

春遲柳暗催 杜甫春城迴北斗郢樹發南枝 金李

俊民梅從今夜落柑憶舊時傳 原唐杜甫樽前柏葉

休隨酒勝裏金花巧耐寒  
方干正氣纔隨灰律變殘

寒更被野梅欺  
羅隱一二三四五六七萬物生芽是

今日  
宋蘇軾七種共挑人日菜千枝先翦上元燈

劉允莊旋遣厨人挑蓐菜虛勞座客頌椒花  
未將柏

葉簪新歲且與梅花叙隔年  
陸游菊芽冒土如爭出

柳色搖村已漸勻  
增蘇軾挑菜年年俗  
青蒿黃韭

試春盤

詞

御製立春調寄太平時淑景維新爆竹聲手調羹詞臣載筆  
賦瓊英學西京鳳閣龍樓晝漸長物資生勸官勉力盡  
昇平竹馬迎

增宋蘇軾減字木蘭花春牛春杖無限春光來海上便  
與春工染得桃紅似肉紅春幡春勝一陣春風吹酒  
醒不似天涯捲起楊花似雪花原歐陽修蝶戀花簾  
幙東風寒料峭雪裏香梅先報春來早紅蠟枝頭雙燕  
小金刀翦綵呈纖巧旋暖金爐熏蕙藻酒入橫波困

不禁煩惱繡被五更春睡好羅帷不覺紗牕曉 增辛

棄疾蝶戀花誰向椒盤簪綵勝整整韶華爭上春風鬢  
往日不堪重記省爲花常把新春恨 春未來時先借

問晚恨開遲早又飄零近今歲花期消息定只愁風雨  
無憑準 原孫巨源傳言玉女一夜東風不見柳梢殘

雪御樓煙暖對鰲山綵結簫鼓向晚鳳輦初回宮闕千  
門燈火九遠風月 繡閣人人乍嬉遊困又歇艷妝初

試把珠簾半揭嬌羞向人手撚玉梅低說相逢長是上

元時節 丘室洞仙歌江城梅柳慣得春先處催趁風  
光上歌舞見九衢車馬流水如龍喧笑語羅綺香塵載  
路 歡娛多暇日樽俎風流重見承平舊官府有多少  
佳麗事墮珥遺簪芳徑裏瑟瑟珠璣翠羽好借取韶華  
醉連宵更莫待收燈酒闌人去 辛棄疾漢宮春春已  
歸來看美人頭上裊裊春幡無端風雨未肯收盡餘寒  
年時燕子料今宵夢到西園渾未辨黃柑薦酒更傳青  
韭堆盤 却笑東風從此便薰梅染柳更沒些閒閒時

又來鏡裏轉變朱顏清愁不斷問何人會解連環生怕  
見花開花落朝來塞雁先還

別錄原占候占書云三日得甲爲上歲四日中歲五日  
下歲月內有甲寅米賤得辛一日旱二日小收三四  
日主水麥半收五六月小旱七分收八日歲稔一云春  
旱不收一日麥收十分二日禾蠶收三日四日田蠶全  
收五日六日麻粟麥蠶半收七日八日旱禾麻麥粟少  
收絲貴通書云歲首甲子蟲災桑穀貴丙子旱戊子

收壬子綿貴 周益公日記云歲首甲寅穀畜貴丙寅

油鹽貴戊寅壬寅穀先貴後賤庚寅穀畜貴 月內有

三卯宜豆無則旱種禾一云一日得卯十分收二日低

田半收三四日大水五日六日半收七日八日春澇全

收乙卯荆楚米貴丁卯周秦米貴巳卯燕趙米貴辛卯

韓魏米貴癸卯宋魯豆貴 得辰一日雨多二日風多

先旱半熟低田全收七月雨多麻豆全收三日雨晴勻

四日收七分五日歲稔六日大稔七口水損田蕎麥收

八日先旱後澇九日大麥收仲夏水災十日旱禾半收  
十一日五穀不收冬大雪十二日冬大雪五穀收 歲  
首得甲申五穀收丙申穀損蟲食菜戊申六畜災壬申  
澇 得酉一日二日大豐三日四日民安五日至十日  
中歲民不安十一十二日歲大熟 月內有三子葉少  
蠶多無三子則葉多蠶少有三卯則旱豆收無則少收  
有三亥主大水一云正月得三亥湖田變成海在正月  
節氣內方準 占書云一日雞天晴人安國泰二日火



晴主大熟三日猪晴主君安四日羊晴主春暖臣順五日馬晴明四望無怨氣六日牛晴明日月光明大熟七日人晴明民安君臣和八日穀夜晴五穀熟所值之日晴暖則安泰蕃息

呂覽云元旦值甲穀賤乙穀貴丙

四月旱丁絲綿貴戊米麥貴巳米貴蠶傷多風雨庚田熟辛米平麥麻貴壬絹布豆貴米麥平癸主禾傷多雨一曰元日值戊主春旱四十五日 上元初日占百果中日占晚稻末日占早稻 占穀旦至食爲麥食至日

眊爲稷眊至舖爲黍舖至下舖爲菽下舖至日入爲麻  
欲終日有雨有雲有風有日日當其時者深而多實無  
雲有風日當其時淺而多實有雲風無日當其時深而  
少實有日無雲風當其時者稼有敗如食頃小敗熟五  
斗米頃大敗風復起有雲其稼復起各以其時用雲色  
占種其所宜其日雨雪苦寒歲惡 占土牛頭黃主熟

又專主菜麥大熟青春多瘟赤春旱黑春水白春多風  
身主上鄉蹄主下鄉田家以此占頗驗 元旦至十二

日每日取水一瓶稱之一日主正月二日主二月其日  
水重則其月雨多輕則少 初一五鼓束高長草把燒  
之名照庭火伺燒將過看向何方倒所向之方其年必  
熟乃以大椽重舉拋丟聽其聲則衆和曰一跌田禾盛  
茂二跌五穀滿倉三跌六畜成羣四跌人口和平如此  
隨口說不拘幾跌 元日牛俱卧則苗難立半卧半起  
歲中平俱立則五穀熟 臘仙神隱立春陰無風民  
安蠶麥十倍東風吉人民安果穀盛 種植大麥杏豌豆

豆芋 移栽棟棠梔子木香紫薇白薇玫瑰銀杏櫻桃

錦帶金雀木蘭榆柏柳松槐 貼接蠟梅黃薔薇梅

插壓木樨杜鵑 培壅石榴梨海棠 澆灌桃瑞香杏

李 整頓燒荒田耕禾地燒苜蓿根理蔬畦壟瓜畦整

農具脩花圃糞田畝 修樹諸果樹脩去低小亂枝勿

分木力則結子肥大 元旦五鼓以斧斫諸果樹則結

子繁而不落辰日亦可 李樹石榴以石安了中堆根

下則結子繁 元旦雞唱時以火照諸樹無蟲此時蟲

尚未出凡聚葉腐枝皆蟲所穴宜去之 收採絡石菊  
根 田忌天火子地火戌糞忌未九焦辰荒蕪已

二月

驚蟄春分春社中  
和節花朝附見

增禮記月令仲春之月日在奎昏弧中旦建星中注日  
月會於降婁而斗建卯之辰也 始雨水桃始華 是  
月也耕者少舍乃脩閭扇寢廟畢脩母作大事以妨農  
之事 梁元帝纂要是月曰仲春亦曰仲陽 花月令  
是月也桃夭棣棠舊薔薇登架海棠嬌梨花溶木蘭競

秀 瓶史月表二月花盟主西府海棠玉蘭緋桃花客  
卿繡絨杏花使令寶相花種田紅木桃李花月季花  
翦春羅 花歷玉蘭解紫荊繁

彙考增詩幽風四之日舉趾同我婦子饁彼南畝田畯  
至喜 四之日其蚤獻羔祭韭 夏小正二月往稷黍  
禪傳禪禪也 榮董采繁傳榮董菜也采繁繁由胡由  
胡者繁母也皆豆實也 榮芸時有見稊始收傳有見  
稊而後始收是小正序也 晉書樂志二月之管名爲

夾鐘者夾佐也。謂時物尚未盡出，陰德佐陽而出物也。

淮南子：二月，官倉其樹杏。注：二月興農播穀，故官倉

也。白虎通援神契曰：仲春獲禾報社，祭稷以三牲，何

重功故也。原說文：卯，冒也。二月萬物冒地而出，象開

門之形，故二月爲天門。增：羯鼓，錄玄宗嘗遇二月初

詰旦，巾櫛方畢，時當宿雨初晴，景色明麗，小殿內庭柳

杏將吐，覩而歎曰：對此景物，豈得不與他判斷之乎？左

右相目將命備酒，獨高力士遣取羯鼓，上旋命之臨軒。

縱擊一曲曲名春光好神思自得及顧柳杏皆已發拆  
上指而笑謂嬪御曰此一事不喚我作天公可乎嬪御  
侍官皆呼萬歲 夢溪筆談二月物生根魁故曰天魁  
晁氏客話望杏而耕以杏花時爲耕候也 成都古

今記二月有花市 暇日記二月白蘋水 風土記浙

風俗言春序正中百花競放乃遊賞之時宋制守土官

於花朝日出郊勸農 賞心樂事二月現樂堂瑞香玉

照堂西湘梅南湖挑菜玉照堂紅梅餐霞軒櫻桃花杏



花莊杏花綺互亭千葉茶花

驚蟄增易解卦天地解

而雷雨作雷雨作而百果草木皆甲拆

前漢書五行

志雷出地則長養華實發揚隱伏宣盛陽之德

論衡

雷二月出地百八十日雷出則萬物出

春分增淮南

子天地之氣莫大於和和者陰陽調日夜分而生物春

分而生秋分而成生之與成必得和之精

白虎通明

庶風春分至王者正封疆脩田疇

農家諺二月昏參

星夕杏花盛桑葉白

荆楚歲時記春分日民竝種戒

火草於屋上有鳥如鳥先雞而鳴架架格格民候此鳥

則入田以爲候 風俗記鼓者春分之音以助萬物發

生 王褒僮約二月春分被隄杜疆落桑披機種瓜作

瓠別茹披蔥 原集韻鵲鳩鳥名春分鳴則衆芳生秋

分鳴則衆芳歇 社原禮記月令擇元日命民社注社

后土也使民祀焉神其農業也 增禮記祭法共工氏

之霸九州也其子曰后土能平九州故祀以爲社 周

禮疏春社以祈膏雨望五穀豐熟 原北史李士謙傳

士謙宗族豪盛二社會宴飲醉喧嘩至士謙所盛饌盈  
前先設黍曰孔子稱黍爲穀之長荀卿亦云食先黍稷  
寧可違乎少長肅然退相謂曰既見君子乃覺吾徒不  
德 增臞仙神隱社日祭五穀之神 提要錄社翁祈

雨不食舊水故社日必有雨謂之社翁雨陸龜蒙詩幾  
點社翁雨一番花信風 中和節增舊唐書德宗本紀  
詔曰四序嘉辰歷代增置漢崇上巳晉紀重陽朕以春  
方發生候及仲月勾萌畢達天地和同俾其昭蘓宜助

暢茂自今宜以二月一日爲中和節內外官司休假一

日 貞元六年二月百寮會宴曲江亭上賦中和節羣

臣賜宴七韻是日進兆人本業三卷司農獻黍粟各一

斗 新唐書李泌傳帝以前世上巳九日皆大宴集而

寒食多與上巳同時欲以三月名節自我爲古若何而

可泌請廢正月晦以二月朔爲中和節因賜大臣戚里

尺謂之裁度民間以青囊盛百穀瓜果種相問遺號爲

獻生子里問釀宜春酒以祭勾芒神祈豐年百官進農

書以示務本帝悅乃著令與上巳九日爲三令節中外  
皆賜緡錢燕會 花朝增提要錄二月十五日爲花朝

翰墨記洛陽風俗以二月二日爲花朝節士庶遊玩  
又爲挑菜節 秦中歲時記二月二日曲江采菜士民

遊觀極盛 誠齋詩話東京二月十二日曰花朝爲撲

蝶會 乾淳歲時記二月二日宮中排辦挑菜御宴先

是預備朱綠花斛下以羅帛作小卷書品目於上繫以  
紅絲上植生菜薺花諸品俟宴酌樂作自中殿以次各

以金篦挑之后妃皇子貴主婕妤及都知等皆有賞無

罰以次每斛十號五紅字爲賞五黑字爲罰上賞則成

號真珠玉盃金器北珠篦環珠翠領抹次亦鈿銀酒器

冠鈿翠花段帛龍涎御扇筆墨官窰定器之類罰則舞

唱吟詩念佛飲冷水吃生薑之類用此以資戲笑王宮

貴邸亦多倣之 熙朝樂事二月二日士女皆帶蓬葉

諺云蓬開先百草戴了春不老 二月十五爲花朝節

葢花朝月夕世俗恒言二八兩月爲春秋之中故以二

月爲花朝八月爲月夕也 原成都志二月十五爲花  
朝爲撲蝶會蜀人又以是日鬻蠶於市因作樂縱觀謂  
之蠶市 壺中贅錄閩中以二月二日爲踏青節蜀中  
以爲踏草節 宣府志宣府花朝節村民以五穀瓜果  
種相遺謂之獻生城中婦女翦綵爲花插之鬢髻以爲  
應節

集藻文賦散句增漢張衡歸田賦仲春令月時和氣清  
原隰鬱茂百草滋榮 魏曹植節遊賦仲春之月百卉

叢生萋萋藹藹翠葉朱莖竹林青蔥珍果含榮感氣運  
之和順樂時澤之有成 原梁昭明太子錦帶書即應  
佳辰時登令月和風拂迴淑氣浮空走野馬於桃源飛  
少女於李徑花明麗日光浮竇氏之機鳥弄芳園韻響  
王喬之管 增唐侯喜中和節賦我后令節中和孔嘉  
凍已全解桃仍欲華慶賞之多宴樂既均於九有播植  
之始教化爰貞於四遐

四言古詩原隋牛弘春祈稷歌粒食興教播厥有先尊



神致潔報本惟虔瞻榆東耒望杏開田用憑戩穀式詠  
豐年。

五言古詩增唐德宗中和節日宴百寮賜詩韶華啟仲  
序初吉諧良辰肇茲中和節式慶天地春歡酣朝野同  
生德區宇均雲開灑膏露草疏芳河津歲華方載陽東  
作方肆勤慚非薰風唱曷用慰吾人 東風變梅柳萬

彙生春光中和紀月令方與天地長耽樂豈予尚懿茲  
時景良庶遂亭育恩同致寰海康君臣永終始交泰符

陰陽曲沼水新碧華林桃稍芳勝賞信多歡戒之在無  
荒

五言律詩增唐王勃仲春郊外東園垂柳徑西堰落花  
津物色連三月風光絕四鄰鳥飛村覺曙魚戲水知春  
初晴山院裏何處染罽塵 白居易春村二月村園暖  
桑間戴勝飛農夫春舊穀蠶妾擣新衣牛馬因風遠雞  
豚過社稀黃昏林下路鼓笛賽神歸 宋徐鉉春分日  
仲春初四日春色正中分綠野裴回月晴天斷續雲燕

飛猶箇箇花落已紛紛思婦高樓晚歌聲不可聞 邵

雍二月吟林下故無知唯知二月期酒嘗新熟後花賞  
半開時只有醺酣趣殊無爛熳悲誰能將此景長貯在  
心脾 張栻仲春過陽江亭子亭古危臨岸林幽巧近

城煙容隨雨住花片著溪清春事已如許客懷誰與傾  
庭前幾株樹滿意欲敷榮 戴復古社日今朝當社日

明日是花朝佳節惟宜飲東池適見招綠深楊柳重紅  
透海棠嬌自笑鬢邊雪多年不肯消 原柳州月泉東

風生意閑農圃正宜勤稻種開包曬菊苗依譜分疇西  
曉耕雨舍北暮鉏雲莫待荒三徑歸歟陶令君 明張

祥爲天氣近寒食村居遠市朝翠低新柳弱紅潤穉花  
嬌聽鳥頻移榻看雲偶過橋隔村春社至會赴野人招  
七言律詩增唐李商隱二月二日二月二日江上行東

風日暖聞吹笙花鬚柳眼各無賴紫蝶黃蜂俱有情萬  
里憶歸元亮井三年從事亞夫營新春莫悟遊人意更  
作風簷夜雨聲 原宋李公麟千尋古櫟笑聲中此日

春風屬社公開眼已憐花壓帽放懷聊喜酒治聲攜刀  
割肉餘風在下瓦傳神俚俗同聞說已栽桃李徑隔溪  
遙認淺深紅 增元洪希文春半採花芳菲著雨便成  
苔問訊東君幾日回閨月不曾花下去今朝偶到樹邊  
來幾何間濶鴛偏老如此生疎蝶也猜流水時光容易  
過舉頭枝上已青梅 方太古社日出遊村村社鼓隔  
溪聞賽祀歸來客半醺水緩山舒逢日暖花明柳暗貌  
春分平田白洳流新雨絕壁青楓挂斷雲策杖提壺隨

所適野夫何不可同羣 明曹大章二月郊南柳色春  
淡雲晴靄動芳辰霏霏花氣偏隨酒嫋嫋鶯歌解和人  
野舫醉乘明月渡芳洲情與白鷗馴武陵溪水深幾許  
笑逐桃花欲問津

七言絕句原唐韓愈賽神白布長衫紫領巾差科未動  
是閑人麥苗含穗桑生甚共向田頭樂社神 增白居易  
易二月二日二月二日新雨晴草芽菜甲一時生輕衫  
細馬春年少十字津頭一字行 原張籍吳楚歌詞庭

前春鳥啄林聲紅夾羅襦縫未成今朝社日停針線起  
向朱櫻樹下行 張演社日村居鷺湖山下稻梁肥狔  
穽雞棲對掩扉桑柘影斜春社散家家扶得醉人歸

宋王安石南浦南浦東岡二月時物華撩我有新詩含  
風鴨綠粼粼起弄日鷺黃裊裊垂 黃庭堅觀化竹筍

纔生黃犢角蕨芽初長小兒拳試尋野菜炊香飯便是  
江南二月天 范成大春日田園雜興社下燒錢鼓似  
雷日斜扶得醉翁迴青枝滿地花狼籍知是兒孫鬪草

來 增范成大社日獨坐海棠雨後沁臘脂楊柳風前

撚綠絲香篆結雲深院靜去年今日燕來時 方岳社

日燕子今年指社來翠瓶猶有去年梅丁寧莫管杏花

俗付與春風一道開 金完顏琦春半喜晴陰寒二月

雪含雲兩日開晴淑景新借問海棠紅幾許杏花楊柳

不曾春 原明陸樹聲熙熙麗日開青野漠漠平時散

碧波山鳥一聲催布穀綠楊陰裏聽農歌 增王衍花

朝晴煙膏露若為容躑躅香苞望曉紅莫怨五更風色惡



開花原是落花風

原曹勲羅綺生香散隱霞春光不

讓五侯家東風二月蘓隄路樹樹桃花間柳花

詩散句增宋謝靈運山桃發紅萼野蕨漸紫苞

唐德

宗東風變梅柳萬彙生春光

周庾信新年鳥聲千種

轉二月楊花滿路飛

原唐唐彥謙二月雲煙迷柳色

九衢風土帶花香

寒郊二月初離別獨倚寒林嗅野

梅 增鄭谷和暖又逢挑菜日寂寥未是探花人

宋

邵雍年年二月凭高處不見人家只見花 陸游數點

霏微社公雨兩叢濃淡女郎花 元趙孟頫二月江南

鶯亂飛百花滿樹柳依依 葉顥燕子不來春又半一

簾花雨海棠時 明吳稼誼三春花事終難負二月風

光半未過 唐杜甫社雨報豐年 釋皎然二月湖南

春草遍 宋陳與義二月山城未見花

別錄原占候十二日晴則百果實 十五日爲勸農日

晴主年豐又爲花朝晴則百果實 春分日風從震來

穀熟麥賤人安年豐青雲歲豐前後一日內有雷主歲

稔 原種植穀黍稷葛秫韭椒蔥夏蘿蔔梨瓠子王瓜

絲瓜菠菜苦蕒莧山藥萵苣稍瓜茼蒿生菜茄冬瓜紫  
蘊四月芥西瓜香芋銀杏十樣錦落花生芝蔴藕枸杞  
翦春羅黃精決明松萱草山丹蜀葵罌粟茶藤柏桑椹  
紅花麗春黃葵金錢翦秋羅金鳳絡麻老少年 移栽

草麻映山紅茄萵苣各色藤菜甘露雪梅堆粟百合苦  
蕒薤石榴十姊妹慈菰木瓜茱萸甘菊松梧桐葡萄薄  
荷黃精牛蒡槐紫荆木槿芙蓉萱花凌霄杜鵑桑海棠

山茶玉簪迎春玫瑰菊石竹望江南芋蔴芭蕉 貼接

桃李梨花紅梅杏柑海棠丁香柿栗桑 插壓石榴芙蓉

蓉梔子梨葡萄瑞香木槿薔薇 壅培木樨 灌溉櫻

桃芍藥牡丹瑞香橙橘 收採萋蒿蕨芽板蕎蕎筆管

菜白芨薺菜百合馬蘭頭蠶豆苗甘遂薯蕷王不留行

黃精榆皮人參枸杞蒲公英黃蘗雲母臺菜白石英石

葦葉白芷白薇甘草紫石英狼毒根麝香豬苓地黃金

銀花麥門冬白朮當歸知母天門冬芋根牛膝香附茯苓

苓茯神黃連狗脊藁本茅香根升麻黃芩紫苑草解金  
雀花前胡防己大黃巴戟天秦皮地榆天雄杜仲丁香  
柴胡棟實蓬蒿桂皮虎杖 整頓去樹裏架葡萄 田  
忌天火卯地火酉九焦丑糞忌戌荒蕪酉

御定佩文齋廣羣芳譜卷二